

ՀՀ Լոռու մարզի Փամբակ համայնքի
ղեկավար պարոն Ս. Կոստանդյանին

Հարգելի պարոն Կոստանդյան

Հայտնում եմ, որ «Զով-Գուժ» ՍՊԸ-ն ՀՀ Լոռու մարզի Փամբակ համայնքի վարչական սահմաններում ցանկանում է իրականացնել Քարաբերդի ոսկու հանքավայրի արևմտյան և արևելյան տեղամասերում օգտակար հանածոյի արդյունահանման երկրաբանական ուսումնասիրության աշխատանքներ: Ներկայացնում եմ ծանուցումը.

1) նախաձեռնողի անունը (անվանումը) և բնակության (գտնվելու) վայրը

Գործունեության նախաձեռնողը «Զով-Գուժ» ՍՊ ընկերությունն է: Իրավաբանական անձանց պետական ռեգիստրում գրանցման համարն է 273.110.1365869, գրանցման ամսաթիվը՝ 24.01.2024թ., գտնվելու վայրը՝ ՀՀ, 0001, ք.Երևան, Կենտրոն, Հյուսիսային պողոտա 1, 2/3:

2) նախատեսվող գործունեության անվանումը՝ օրենքի 12-րդ հոդվածին համապատասխան, նպատակը, համառոտ նկարագիրը.

Քարաբերդի ոսկու հանքավայրի արևմտյան և արևելյան տեղամասերը գտնվում են Հայաստանի Հանրապետության հյուսիսային մասում, վարչական տեսակետից Լոռու մարզում՝ Վանաձոր քաղաքից 4.5 կմ հեռավորության վրա դեպի հյուսիս-արևելք, Բազումի լեռնաշղթայի հարավային լանջին: Երկրաբանական ուսումնասիրություն, ինչ համապատասխանում է «Շրջակա միջավայրի վրա ազդեցության գնահատման և փորձաքննության մասին» ՀՀ օրենքի 12-րդ հոդվածի 4-րդ մասի 2)-րդ կետի ա. ենթակետին՝ երկրաբանական ուսումնասիրություններ: Շրջանն ունի բավական բարդ և հետաքրքիր երկրաբանական կառուցվածք, որը պայմանավորված է դրա տեղադիրքով Փոքր Կովկասի մեզանտի-կլինորիումի Սևան-Ամասիայի տեկտոնական գոտու հյուսիս-արևմտյան մասում: Վերջինս գտնվում է Սոմխեթ-Ղարաբաղի և Հայկական ծալքավոր գոտիների միջև:

Ուսումնասիրվող շրջանն ունի բլոկային կառուցվածք, գտնվում է առաջին կարգի տեկ-տոնական բլոկների՝ Փամբակի գրաբեն իջվածքի և Բազումի հորստ-բարձրացման հանգույցում, որոնց հպման մասով անցնում է Սևանա-Աքերինյան երկարակյաց ընդհանուր կովկասյան տարածման խորքային խզվածքի առանցքային գոտին: Տարածաշրջանը կապված է տարբեր հասակի տեկտոնական և մագմատիկ բազմակի ակտիվացման հետ, աչքի է ընկնում ոսկու, պղնձի, բազմամետաղների, մանգանի, երկաթի նաև ծծմբի կոլչեդանի էնդոգեն հանքայնացման բազմաթիվ կետերի, հանքերակումների և առանձին դեպքերում հանքավայրերի առկայությամբ: 2002-2008թթ.-ի աշխատանքների ընթացքում ուսումնասիրվել են Քարաբերդի հանքավայրի Արևելյան և Արևմտյան տեղամասերը: Հանքավայրի *Արևմտյան տեղամասը* գտնվում է բուն Քարաբերդի ոսկու հանքավայրից արևմուտք, 100-150 մետր հեռավորության վրա և ձգվում է դեպի հյուսիս-արևմուտք մոտ 1800-2000 մետր:

Երկրաբանական կառուցվածքում մասնակցում են վերը նկարագրված նույն հրաբխանստվածքային ապարները, որոնք հիդրոթերմալ խիստ փոփոխված են՝ ենթարկված կարբոնատացման, օխրայացման, քվարցացման:

2007-2008թթ. կատարված որոնողական աշխատանքների արդյունքում մակերեսային լեռնային փորվածքներով (հետախուզաառուններ) մերկացվել են մի շարք երակային տիպի հանքային մարմիններ քվարց-բազմամետաղային և քվարց-մալխիտ-բազմամետաղային կազմով: Խորքում հանքայնացումն ուսումնասիրվել է 70մ խորությամբ թիվ 1 հորատանցքով:

Քարաբերդի ոսկու հանքավայրի *Արևելյան տեղամասը* հայտնաբերվել է 2007թ.-ին որոնողական աշխատանքների արդյունքում և գտնվում է բուն հանքավայրից 1.0-1.1 կմ դեպի հարավ-արևելք: Տեղամասի երկրաբանական կառուցվածքում մասնակցում են միջին էոցենի հասակի հրաբխանստվածքային ապարները, ներկայացված տուֆավազաքարերով, տուֆափշրաքարերով և պլագիոկլազային պորֆիրիտներով, որոնք հանքային մարմինների տարածման սահմաններում ենթարկված են հիդրոթերմալ փոփոխման:

Աշխատանքների ակնկալվող արդյունքներն են՝

- ✓ մշակել տեղամասի արդյունաբերական նշանակության վերաբերյալ արդիականացված տեղեկատվական համակարգ,
- ✓ հաշվարկել և հիմնավորել կոնդիցիաների նոր պարամետրեր,
- ✓ իրականացնել Կենտրոնական տեղամասի պաշարների վերգնահատում,
- ✓ ապահովել ՀՀ ընդերքի մասին օրենսգրքի 59-րդ հոդվածի 4-րդ մասի և ՀՀ տարածքային կառավարման և ենթակառուցվածքների նախարարի 08.08.2022թ.-ի «Օգտակար հանածոների հանքավայրերի կոնդիցիաների պարամետրերի երկրաբանատնտեսագիտական հիմնավորման մեթոդական ցուցումները սահմանելու մասին» №12-Ն հրամանի պահանջները:

Բնապահպանական միջոցառումներից նախատեսվում է.

- փոշեառաջացման կրճատում և վերահսկողություն՝ հորատման լուծույթների կիրառման, հորատման հարթակների ջրցանման, ռեկուլտիվացիայի եղանակով;

- հողերի պահպանություն՝ հորատման հարթակներից հողաբուսական շերտը նախապես հեռացնելու, պահեստավորելու և հետագա կենսաբանական ռեկուլտիվացիայի ժամանակ օգտագործելու եղանակով;

- տեղամասի աղտոտման բացառում՝ կենցաղային աղբի հավաքման և կազմակերպված աղբավայր տեղափոխելու եղանակով;

- Շրջանի կենսաբազմազանության պահպանության նպատակով տեղամասի շահագործման աշխատանքներին մասնակցող անձնակազմի վերապատրաստում և ծանուցում շրջանում հայտնի՝ ՀՀ կենդանիների և բույսերի կարմիր գրքերում գրանցված տեսակների վերաբերյալ:

- Հազվագյուտ երկրաբանական մերկացումներ և հանքաբանական գոյացումներ, երկնաքարեր, հնէաբանական, հնագիտական, գիտական և գիտամշակութային հատուկ արժեք ներկայացնող այլ օբյեկտներ հայտնաբերելու դեպքում աշխատանքների դադարեցում և այդ մասին լիազոր մարմնին տեղեկացում՝ հետագա աշխատանքների ընթացքը պարզաբանելու նպատակով:

- Աշխատանքների ընթացքում պատահական գտածոների ընթացակարգի կիրառում :

3) նախատեսվող գործունեության իրականացման վայրը:

Աշխատանքները կատարվելու են Հայաստանի Հանրապետության հյուսիսային մասում, վարչական տեսակետից Լոռու մարզում՝ Վանաձոր քաղաքից 4.5կմ հեռավորության վրա դեպի հյուսիս-արևելք, Բազումի լեռնաշղթայի հարավային լանջին: Հանքավայրի ամենամոտ բնակավայրը դեպի հյուսիս-արևմուտք գտնվող Քարաբերդ գյուղն է, որի հետ այն հաղորդակցվում է մոտ 1.5կմ երկարությամբ զբոսային ճանապարհով:

Հիմք ընդունելով <<ՇՐՋԱԿԱ ՄԻՋԱՎԱՅՐԻ ՎՐԱ ԱԶԴԵՑՈՒԹՅԱՆ ԳՆԱՀԱՏՄԱՆ ԵՎ ՓՈՐՁԱՔՆՆՈՒԹՅԱՆ ՄԱՍԻՆ>> ՀՀ օրենքի և ենթաօրենսդրական ակտերի պահանջները խնդրում եմ «Զով-Գուժ» ՍՊԸ-ի ՀՀ Լոռու մարզի Փամբակ համայնքի վարչական սահմաններում Քարաբերդի ոսկու հանքավայրի արևմտյան և արևելյան տեղամասերում օգտակար հանածոյի արդյունահանման երկրաբանական ուսումնասիրության աշխատանքների իրականացման համար կազմակերպել հանրային ծանուցում/լսում և տալ համաձայնություն:

Կից ներկայացվում է հատակագիծը՝ կոորդինատներով:

«Զով-Գուժ» ՍՊԸ
տնօրեն՝



Հ. Հակոբյան

Հասցե՝ 0001, ք.Երևան, Կենտրոն, Հյուսիսային պողոտա 1, 2/3
հեռ. (091) 42-10-42

09.07.2025թ.